



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7



Biden-i Kentucky nung major disaster ka sangdong

PM Modi-i Kashi Vishwanath Corridor Phase 1 lapoktsü



VOL. XIX NO. 67 (ADOK 67)

DIMAPUR

SANGTENNÜ (TUESDAY)

LUCHII

(DECEMBER) 14, 2021

₹ 5.00

## Union Minister Virendra-i SCs, STs atema national helpline lapoktsü



December 13, 2021 nü Union Minister for Social Justice and Empowerment Dr. Virendra Kumar-i National Helpline Against Atrocities (NHAA) lapoktsüba angur.

**Guwahati, December 13, 2021 (Agencies):** Hombarnü Union Minister for Social Justice and Empowerment Dr. Virendra Kumar-i National Helpline Against Atrocities (NHAA) lapoktsüogo.

Iba helpline ya Hindi, English aser state/UT indang regional language nung toll-free number '14566' ajanga lapoker.

Iba helpline number ajanga Scheduled Castes and the

Scheduled Tribes (Prevention of Atrocities) [PoA] Act, 1989 timi inyaka otettsü aser Telecom Operator mashi ka indang mobile mesüra landline number nungi voice call /VOIP asütsü akok.

Scheduled Castes (SCs) aser Scheduled Tribes (STs) züngsemtem dak tashiyim mapa inyakba noktangsü atema PoA Act ya latetba lir, ta Ministry of Social Justice & Empowerment-i ashi.

## India nung totzü jenjang ajemtsü akok

**Guwahati, December 13, 2021 (Agencies):** Hombarnü Centre sorkari strategic petroleum reserves (SPR) nungi crude oil 5 million barrels agütsütsü molungogo aser iba ajanga India nung totzü jenjang ajemtsü akok.

Hombarnü Rajya Sabha nung petroleum ministry-i iba osang metetdaksü.

India sorkari United States, China, Japan aser South Korea linüktem den asüngdangtepba sülen iba telemtetba agiogo.

"India sorkari November 3 nü linük nung petroleum jenjang

kanga tasak asüba meyipa repringshir. India sorkari petrol litre nung Rs 5 aser diesel litre nung Rs 10 'central excise duty' ajemogo" ta ministry-i metetdaksü.

Iba sülen state sorkar aikati totzü nung VAT ajema liasü, ta parnokisa ashi.

Taküm November ita United States-i China, Japan, India, South Korea aser United Kingdom den asüngdangteper par strategic reserves nungi crude oil 50 million barrels tashi agüja liasü.

## COVID-19 Nagaland: 3 dak putet & 5 taneptsü angu

**Kohima, December 13, 2021 (TYO):** Nagaland nung Hombarnü nisung 3 dak COVID-19 putet aser pungu taneptsü angu.

"Tanü putetertemji Dimapur, Mokochung aser Zunheboto nung nisung kaka li" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü Dimapur nung nisung 3 aser Kiphire o Kohima nung nisung kaka taneptsü angu. Parnok züngsema taneptsü angur ajak agi nisung 30,292 kümogo" ta pai ashi.

Tang nisung 99 anepaludar saka parnok 80 dakbo shirangba yimya kecha mali ta Dr. Kikon-

isa ashi.

"Hombarnü tashi nung nisung 762,722 nem COVID-19 vaccine indang dose 13,26,615 agütsüogo" ta State Immunization Officer, Dr Ritu Thurr-i ashi.

"Vaccine agirtemji frontline workers 60,983, healthcare workers 16,004, arishi küm 45 ser temapur 212,581 aser arishi küm 18 nungi 44 tsüngda alir 473,154 lir" ta paisa ashi.

"Vaccine agirtem rongnungi nisung 563,893-i dose anaprong agiogo. Parnokji frontline workers 48,571, healthcare workers 13,532, arishi küm 45 ser temapur 176,394 aser arishi küm 18 nungi 44 tsüngda alir 325,396 lir" ta Dr Thurr-isa ashi.

## Sepaitemi jelia sentong renemer Oting nung tepset: NPP

**Dimapur, December 13, 2021 (TYO):** December 4 nü Mon district kübok Oting nung army Para Special forces unit ajanga nisung 14 tepsetba ya jelia sentong renemer inyakba mapa ka lir ta National People's Party (NPP)-i ashi.

Iba ya maitsü aibelena inyakba mapa ka masü saka sepaitemi jungjunga shisadanga inyakba mapa ka lir, kechiyong iba lendong nung khasertem indang mangtemji army truck gari nung plastic sheet agi nembanger liasü aser army camouflage dress tejen semtsür liasü, ta NPP-i ashi.

"Iba ajanga sepaitemi parnok

ya taila khatepba nung tepsetba aser yimdaklirtemji telungpurtem liasü ta tiyazü kuli agütsütsü tebilemba liasü. Yamaji mesüra kodaser sepaitemi army camouflage sübötüsü tejen kechiba bener aru aser tasü mangtem nungi süoshi agizük?" ta NPP-isa asüngdang.

Iba mapa nung shilem agiba army officers aser jawans ajak Supreme Court ajanga lateta aliba ama ken o benoka angadangsüla aser tekartiba nung temeten agütsütsüla, ta parnokisa metetdaksü.

Nagaland aser Northeast nungi Armed Forces Special Powers

Act (AFSPA) agientsüla kechiyong security forces-i iba Act tim mesüi amshir aser Northeast nung nisung meyrjang aika tepsetogo, ta NPP-i ashi.

AFSPA anema PILs aika benokogo aser Commission aikati India sorkar dang iba Act agientsü shiogo saka Centre-i kecha meinyaker. Tanü tashi nisung tepsetba manener aser Act ya magienra maneni tepsettsü, ta parnokisa ashi.

Centre-i Oting tatalokba indang osang tiyazü sangdongba aitsür aser iba ya nisung tepsetertem kümzüksü atema inyakba mapa ka lir, ta NPP-isa metetdaksü.

## UDA sorkari Amit Shah-i jembiba aitsütsüla: RPP

**Dimapur, December 13, 2021 (TYO):** Home Minister Amit Shah-i Parliament nung Oting nung nisung aika tepsetba indang osang tiyazü sangoktsüba aitsür, ta Rising People's Party (RPP)-i ashi.

"Iba ajanga Nagaland nung tensa tamajungba küm daksü aser tesem aika nung lungkak aitba den pa (Amit Shah) mesüka yanglur rongdokogo. Anungji Home Minister-i tanga ratadaksütsü aser 21 Para SF kümzüksü atema osang yanglurshir jembiba meyipa agütsüla" ta RPP-i takhangba agütsü.

Amit Shah-i December 6 nü iba osang metetdaksü saka hopta ka süiaka UDA sorkar nung adenba telok aseme ano maitsü lir.

NDDP, BJP aser NPF teloktemi Amit Shah-i jembiba olen aitsütsüla aser UDA sorkar teloktep ya party politics den temaba lir ta sayutsüla, ta RPP-i ashi.

December 20, 2021 nü Nagaland Legislative Assembly nung MLA 60 prongi 21 Para SF ajanga Oting nung nisungtem tepsetba aitsütsüla ta RPP-i takhangba agütsü.

Army-i mapa nung jenjang temabai atutsü aser medals angutsü atema Kashmir aser tangalen nisungtem tepsetba kulitem ngutetogo aser Oting nunga kasa tangatetba nung inyak asütsü ta parnoki ashi.

Mon nung nisungtem tepsetba ya High court/Supreme Court nung tang teinyakdak Judge kati

bushisüngdangtsü nüngdaker. Anungji NLA-i Supreme Court ajanga ketdangsüa bushisüngdang asütsü atema telemtetba ka agütsüla. State sorkari temeten atema iba onük ya tematiba jenjang nung inyaksüla, ta RPP-isa metetdaksü.

Ano, Mon district nung Deputy Commissioner (DC) aser Superintendent of Police (SP) nati mapa shitak meinyakba ajiteter, kechiyong 21 Para SF ajanga mezüing injang yokba aser tanaben yokba tsüngda ghonda 5 shi tetsüngda lir. Iba tongtipang mapang nung district administration maliasü, anungji SIT-i osang magütsü tashi DC aser SP na mapa nungi anenja atatsüla, ta RPP-isa ashi.

## Nagaland lendong ajanga AFSPA agientsü kuli agütsür: Irom Sharmila



Irom (File photo)

**Kolkata, December 13, 2021 (Agencies):** Nagaland nung sepaitemi tawa civilian tem tepsetba ajanga Northeast nungi Armed Forces (Special Powers) Act (AFSPA) agientsü tenük lapoktsür ta AFSPA anema küm 16 lumia lungkak aiter rights activist Irom Sharmila-i ashi.

AFSPA ya tashiyim ozüng ka dang masü saka meimchir temetentem alema lir, ta Sharmila-i ashi.

"Nagaland lendong ajanga tashiyim aketba AFSPA northeast

meypa repringshitsüla" ta laisa ashi.

Northeast nungi AFSPA agienba ajanga law & order tensa tamajungba akümsü asü koda ta osangbeneri asüngdangdang "Telungpur maparen azioktsü atema lenmang aika lir. Chhattisgarh nung Maoist ajanga lendong aika agütsüogo, süra sorkari AFSPA benok asü mebenok? Mebenok. Iba state nung sepaitemi Maoist anema inyaker aser parnoki takok nguogo. Kasaji Northeast nunga inyaktettsü" ta Sharmila-i langzü.

"Kü taküm piyong ni Gandhi-i sayuba non-violence tangatetba nung amang. Ni lumia lungkak ait saka küm 16 tashi lumiba anendang nisungtemi ni mangatet. Ni lumiba ajanga alizüng kecha metongtet" ta Sharmila-isa ashi.

Lai armed forces anema tebilemba kecha mali saka politics aser political party temi Northeast nung timtemdaksür ta Sharmila-isa shisem.

## Mokokchung nung Universal Health Coverage Day mungogo



**Dimapur, Luchii/Dec. 13 (TYO):** Chief Medical Officer Office conference hall, Mokokchung nung Universal Health Coverage Day cum ASHA Felicitation sentong ka December 13, 2021 nü "Leave no one's Health behind: Invest in health system for all" omen nung ajemdaker agia liasü.

Iba sentong nung Dr. Aonungdok, Deputy Chief Medical Officer, Mokokchung ajanga iba anogomung indang rateta ashi.

Senotsü nung timtem majurui ajaki health service tajung agitettsü langa lir, aser yamaji Universal Health Coverage Day amungba ajanga health system tajungba ataa

aliba niburtem ola temai adoker, ta pai ashi.

Iba dak sendakba nung ASHAs temi tongti shilem agiba indang pai ashi, kechi aser parnoki yimdam-yimtsüng sasep nung mapa inyaker aser anasatiba District Hospital nung temang anepalutsü, mapang shidak nung mozü agitsü aser ANC amala atema ajungshir, ta pai ashi.

Ajidang masü, health services nung niburtemi timtem ajuruba parnoki osang agütsür aser parnoki ajangshiba nung takok anguba osangtema agütsür, ta pai ashi.

Iba sentong nung Dr. Ayangla Saku, DPO (UIP&RCH) ajanga ASHAs

tem nem tenütsang agütsüba mapantg, parnoki mapa meranga inyakba atema pelaba lemsatsep aser tarutsü anogotem nunga maneni mapa tajung inyaksü ajungshia liasü.

Tang tashidak wara agi tesem ajunga sünger lia parnoki shilem tajung agiba atema lai ASHAs tem dang pelaba lemsatapa liasü.

Alempang nungi Tialemla, Tongdentsuyong nungi Imsuinla Ao aser Sangtemla nungi Tenjenrenla nung District nung ASHAs ama mapa nung nendaka inyakba atema State level certificate agütsü liasü.

Urban ASHAs ajunga nem Chief Medical Officer-i tepela temaitsü lemsatapa liasü.

## Lanu putu ajungmesotsü asoshi lenir tajung nungdaker: TRZeliang



Zeliang Officers' Association Nagaland (ZOAN) pur 7 buba General Conference December 11, 2021 nü JTWWO Hall, Jalukie town nung amungba noksa nung angur.

**Dimapur, Luchii/Dec. 13 (TYO):** Zeliang Officers' Association Nagaland (ZOAN) pur 7 buba General Conference ya December 10-11, 2021 anogotem JTWWO Hall, Jalukie town nung agia liasü, kong Advisor, Water Resources, Namri Nchang aser Leader of the NPF Legislators Party, T.R Zeliang na alakteta jaoker liasü.

Namri Nchang-i iba sentong nung jembiba mapang, officer tem ya lokti nung milen abenertem lir, ta ashi aser maneni tarutsü asoshi shisadanga inyaksü ajungshia liasü.

Pai iba sentong nung adener officer tem dang tanüla nung ka sür pei tetsü oshi wazüka ayutsü aser temaba jenjangi ajungkettsü atema mera agitsü shia liasü.

Lenirtemi tali bendanga agütsüshir akhi mapang Zeliang kin temi konang-nütsang bener aruja aliba ama inyaksüla, ta Namri-isa shia liasü.

Pei kin tejakleni anir aotsü mechi officer temi lungjemer inyaksüla, ta T.R Zeliang-i iba sentong nung ajungshi aser alima asoshi aser nibur asoshi

tatishitsü tajung ka akumtsüsa meranga inyaksüla, ta ashi.

Lanu putu ajungmesotsü asoshi parnok ranglokdak lenir tajung nungdaker, anungji iba khuret ji lenirtemi angateta kaketshirtem tarutsü tia melenshitsuksüla, ta Zeliang-i ashi.

Lenirtemi shilem agiba ajanga ajungmesotsü atema küm nung anaben mesüra khen kaketshir atema orientation sentong agitsü nungdaker, ta pai shia liasü.

Terenlok maparen balala indang onük nung jembiba mapang, sorkar sentongtem, talisa sorkar indang communitized sentongtem yimdam yimtsüngtem nung niburtem ajangzüksü asoshi niburtem nung kanga junga angatetdaksütsüla, ta T.R Zeliang-i ashi.

Yimtsüng aser niburtem renloktsü atema Zeliang-i maneni onük ana benoka liasü. Tang teinyakdak aser mapa nungi anisüngzüker aliba (retired) ZOAN officer temi yimtsüng nung primary school ka adopt asütsüla aser mapa nungi anisüngzüker aliba

ketdangsürtem shirnok mapa inyaktettsüsa ali, parnoki tang teinyakdak aser mapa nungi anisüngzüka alirtem tsüngta tesendaktep tajungba lidaktsütsü atema ex-officer association ka tenzüksüla, ta pai ashi.

"Politics" aser "Clean Election" indang jembiba mapang, vote atema sen mesüra sen atema vote agütsüba temenen ya ajak lungjemer inyakba aser lenirtemi niburtem dang shisa tajung agütsü len aniba ajanga dang samatsütettsü, ta pai ashi.

Iba sentong nung Convenor, ZOAN, Peren Unit, Er. Asembe Mbung menden liasü, ZOAN tir Hiazu Meru-i tarur pela agizükba o jembiba aser ZOAN tatong tir Er. Achakbo Newmai-i melepzüng o jembiba liasü.

Iba sülen ZOAN Joint Secretary, Keyirangding Hegui-i anir business session agi, kong General Secretary & Treasurer, ZOAN, ZOAN indang unit ajak aser ZOAN indang Committees & Sub-Committees ajungai osang agütsü liasü.

## Sovima Village Council-i Oting nung asür nem akum agütsü

**Dimapur, Luchii/Dec. 13 (TYO):** Mon district kübok Oting yimtsüng nung December 4, 2021 nü lendong atalokba mapang asütem nem akum agütsü Sovima Village Council ajanga parnok küm tatem lokti senden mamandang minute ana süngjema liasü.

Iba lendong atalokba anogo aser tasüng atalokba indang otsü tarensen agi lemsatsepba mapang, SVC Chairman Sebastian Zumvü-i Armed Forces (Special Powers) Act, 1958 nung tashi temeden agütsü aliba indang tesasaba lemsatsep, koba agi sepaitem nem temolung melemba kisüng atema khasettsü mela lir. Linük nung AFSPA dang nungi Prevention of Cruelty to Animals Act, 1960 ajanga shiruru wazüka ayutsü temeden agütsüba ya tajungba lir, ta pai ashi.

AFSPA ya Manipur aser Nagaland state, aser Arunachal Pradesh kübok Tirap, Changlang aser Longding district tem aser Assam kübok police station kar kübok dang benoka lir, anungji kechiba item tesemtem nung dang tenük yoker, kong niburtem ya

shiruru dang nungi tamajungba ama züngshir, ta pai ashi.

AFSPA ya 1958 küm Assam kübok iba mapang aliba Naga Hills atema yanglua liasü. Saka tangbo Northeast ajunga nung tensa kanga junga melenshiogo, aser küm 60 jakdang aliba dang nungi kanga agi tajungba lir, aser iba ozüng amshitsü menüngdak," ta pai ashi.

Linük lungjema aser wazüka ayutsü atema mitkartemi tashi balaka nungdakra, ibaji parnok nem agütsü. Saka sepiatem par mapa asoshi par khuret asütsüla, ta Zumvü-i ashi.

Meimchir dak apet ozüng amshitsüla, ta pai ashi aser sepai lanur ka pei mapa inyakba mapang takum bendanga agütsüba asoshi sasaba lemsatapa liasü.

Tia maka iba lendong ya atalokba ajanga ajaki sempaba AFSPA agientsü niburtemi ola tali tesashiba adoker, ta ashi.

"Iba Act agientsü mesüra yanglushitsü asoshi mera tajungtibaji Naga nung yimtenren ken o matsülangi tekeratiba nung tatem kati aruba nungi agitettsü," ta pai ashi.

## Nagaland nungi Health Worker asem nem tetushi agütsü



Kesangcette, Viseno Dolie aser Rhikiuchi nungertem müketa Dr. I. Talitemsula, M.D, NHM aser Dr. Thanghoi SPO, NHM Nagaland nokdaka aliba noksa nung angur.

**Dimapur, Luchii/Dec. 13 (TYO):** Nagaland nungi Health Worker asem nem New Delhi nung December 13, 2021 nü Best Performance sempet agütsü liasü.

Health Worker asem - Anatonger Health & Wellness Center (HWC), Kiphire nung Community Health Officer, Viseno Dolie; Phelungre HWC Kiphire nungi Rhikiuchi ANM aser Pungwla HWC, Peren nungi Kesangcette ASHA den külemi State aser UTs 36 nungi dangartem nem iba sempet ya New Delhi nung Universal Health Coverage Day, 2021 amungdang agütsü liasü, kong Union Minister of State, Health & Family Welfare, Dr. Bharati

Pravin Pawar tongti tesemdanger liasü.

Comprehensive Primary Health Care kübok parnoki dangar dak nungi alakteta inyakba asoshi Best Ayushman Bharat-Health & Wellness Center- Primary Healthcare Team Award telemsa nung iba konang tetushi agütsü liasü.

Iba sempet angurtem ya meina Dr. I. Talitemsula Jamir, Mission Director, National Health Mission (NHM), Nagaland; Dr. Thanghoi Lam, State Program Officer, NHM, Nagaland aser Pairson, State Program Officer, CPHC-NISHTHA Jhpiego-Nagaland nungertem oa liasü.



Assam kübok Dibrugarh district nung aliba Brahmaputra Cracker and Polymer Limited (BCPL)-i chief minister's relief fund nem Rs 1 crore agütsüdang agiba noksa angur. BCPL ketdangsurtemi Assam chief minister Himanta Biswa Sarma nem cheque ji agütsü.

## Centre-i Bodoland Territorial Council nem Rs.749.63 crore agütsüogop

**Guwahati, December 13, 2021 (Agencies):** Centre-i taoba küm asem tsüingda Bodoland Territorial Council (BTC) nem special package kübok Rs.749.63 crore agütsüogop ta DoNER Minister G. Kishan Reddy-i Lok Sabha nung ashi.

Ministry of Development of North Eastern Region (MDoNER) ajanga centrally-sponsored scheme ka danga meinyaker ta pai ashi.

Ajisüaka taoba küm asem tsüingda MDoNER-i Assam sorkar nem Rs.1467.51 crore tashi central sector schemes agütsüogop ta Reddy-i ashi.

"MDoNER-i Bodoland Territorial Council (BTC) nem

indangindang sen magütsür" ta paisa shisem.

Ajisüaka, Ministry-i Bodoland Territorial Council nem special package kübok sen agütsü, ta pai metetdaksü.

"Iba package kübok Rs.750.00 crore tashi agütsüogop. Iba nung Rs.749.63 crore indang projects 65 lir aser iba nungi tesüiba kü asem tsüingda Rs.3.85 crore dena Rs.714.24 crore tashi agütsüogop" ta Reddy-i ashi.

Tang tashi Rs.589.11 crore indang projects 54 renemogo aser tangatemji tang teiyakdak lir, ta paisa shisem.

India sorkar, Assam sorkar aser Bodo Groups (ABSU

and NDFB factions) tsüingda January 27, 2020 nü Memorandum of Settlement (MoS) ka nung sign sütep.

Iba MoS nung Assam sorkari küm asem atema BTC nung special development atema kümshia Rs. 250.00 crore lezmüksütsü shia lir.

India sorkaria küm asem atema Rs.250.00 crore talila agütsütsü akok ta lateta lir.

Assam sorkari November 2021 tsüingda Rs. 265.00 crore indang project proposals 3 agütsüogop. Iba ya Bodoland Territorial Council ajanga renemba lir aser special development package kübok sen meshir, ta DoNER Minister Reddy-isa metetdaksü.

## Manipur nung Nupee Lal Day among

**Imphal, December 13, 2021 (Agencies):** Manipur nung tasütait tetsürtem bilemteta yashi Nupee Lal Day mongogo.

British nunger yimsüsüba mapang shishilembaba amokbangtsü merangba anema Manipur tsürtemi noktak.

Nupee Lal Memorial Complex nung sentong ka agidang Chief Minister N. Biren Singh, Youth Affairs & Sports Minister Letpao Haokip, Education Minister S. Rajen Singh, Minister, MLA aser ketdangsur aika aden.

"Tang aliba Nupee Lal

complex ya yakta modern complex kümdaksütsü, iba atema state sorkari Rs. 1.30 crore lezmüksüogop. Tanü asenoki oboula aser otsüla nungertemi mapang balala nung tasü itta raraba bilemtettsüla" ta N. Biren Singh-i ashi.

State sorkari Manipur atema taküm bendanga agütsürtem bilemteter. Anglo-Manipur War, 1891 sülen Andaman and Nicobar islands nung puoka ayurtem bilemtettsü atema Shaheed Minar anasa memorial pillar ka yangluogop, ta pai ashi.

Union Home Minister Amit

Shah-i Rani Gaidinliu Tribal Freedom Fighters Museum atema lung azüingtsüogop. Iba ya Tamenglong district kübok nüjiso atema rarartem adokdak Luangkao yim nung yanglutsü, ta Biren-isa metetdaksü.

Manipur tsürtemi mapag shia lokti atema inyaka arur. Parnoki state atema shilem tulu agiogo aser parnok anisüngzüka alitsü langa lir. Iba jagi sorkari parnok yaritsü meranger, ta paisa ashi.

Iba sentong nung Chief Minister Biren Singh-i anir nisungtemi Nupee Lal Statue nung naroyu ja tetushi agütsü.

## Amit Shah-i jembiba o meyipa agütsüla: Manipur Nagas

**Imphal, December 13, 2021 (Agencies):** Nagaland nung sepaitemi civilian 14 tepsetba anema Manipur nung aliba Naga nungertemi lungkak aitogo.

Manipur nung United Naga Council (UNC), Naga Women's Union (NWU) aser All Naga Students' Association Manipur (ANSAM) teloktemi Ukhrul, Senapati, Chandel aser Tamenglong district tem külemi Honibarnü lungkak aitba sentong ayongzüka agi.

December 4 nü 21 para military-i civilian tem tepsetba khukhua aitsür. Naga nungeri küm aika reshikangshia arur. Ozü lima nung AFSPA benokba aser iba sülen Naga nunger aliba tesem ajunga nung sepa mapam lemzüksüba ajanga azütokshiba manener" ta ANSAM general secretary AC Thotso-i ashi.

"Maitsü aibelan ta sür tai maketba nisungtem tepsetba onoki aitsür. Union Home Minister Amit Shah-i Parliament nung osang tai agütsüba meyipa agütsüla. Linük nung lennir kato yamai Parliament nung nisungtem anisatsü merangba atema sasa bilemer" ta Thotso-isa ashi.

Home minister-i tatok meshitsüla aser pai tai jembiba meyipa agütsüla. India sorkari Naga nunger madak miima rara ayongba anentsüla, ta paisa metetdaksü.

"Küm 20 tema Indo-Naga olemtep liyonga aru. Onoki teletetba tajung ka imlar saka

iba ama mapang ka nung tetsübutsü lendong atalokogo. Onoki sorkar dang Naga nunger anema kiralonggraba mapam inyakba anentsü aser Indo-Naga yimjung teletetba agütsü ayongzüker" ta AC Thotso-isa metetdaksü.

UNC president S Kho John-ia Nagaland nung nisung tepsetba aitsü aser tasür o kinungertem den mangyimba metetdaksü.

"Para military forces-i nisung tepsetba onoki aitsür. India sorkar dang tekaratiba nung Armed Forces (Special Powers) Act (AFSPA) agientsü akhanger" ta Kho John-isa ashi.

Iba tashiyim Act ya küm 62 tema northeast region nung amshir. Naga movement kanga tashi itta inyakba mapang iba Act benok. Prime Minister Jawaharlal Nehru lenisüba kübok India sorkari 1958 küm tanabuba Naga people convention nung jembitepba mapang liasü, ta pai metetdaksü.

"Naga people convention den jembidang Nehru-i northeast region nung AFSPA benok aser iba ya talisa Naga nunger azüoktsü atema liasü. Anungji iba Act ya taoba küm 62 tema amshia arur aser nisung taküm aika samaogop" ta Kho John-isa ashi.

Parnokisa Prime Minister Narendra Modi nem memorandum ka agütsüba nung India-Nagaland teletetba magidang AFSPA agientsü shia liasü.



Manipur nung Director General of Police (DGP) inyaksü atema Indian Police Service (IPS) officer P Doungel shimogo. Manipur Governor-i P Doungel nem Manipur DGP indang mapam inyaka atatsü temelaba agütsü. 1987-batch IPS officer Doungel ya tang DG (Prisons) inyaker.

## Kamrup-M nung COVID ajanga asür nem teyari agütsütsü

**Guwahati, December 13, 2021 (Agencies):** Assam nung Kamrup-Metro district administration-i COVID-19 ajanga asür kinunger shia nem Rs 50,000 agütsütsü osang metetdaksüogop.

Kamrup-M district administration-i "state disaster response force (SDRF)" kübok sen teyari agütsütsü.

"Circle Offices ajak nung Claim forms agütsüogop aser bangdakpurtemi Kamrup Metropolitan district indang Revenue Circle mesüra Deputy Commissioner & Chairman, District Disaster Management Authority, Kamrup Metropolitan District dang meshir agütsütsü akok" ta Kamrup Metropolitan district ketdangsurtemi ashi.



Hombarnü Social Welfare Minister Kyrmen Shylla-i Directorate of Social Welfare, Shillong nung Elder Line ta ser teintet rogotem atema national helpline ka lapoktsüogop. Teintet rogotemi toll-free number - 14567 nung jembiba ajanga healthcare, elder-friendly products, aser old age shelter homes indang osang angutsü akok. (Shillong, December 13)



# TIR YIMYIM

## YIMOBILEM (EDITORIAL)

DIMAPUR SANGTENNÜ, LUCHII (DECEMBER) 14, 2021

### Lendong madak lendong

**D**ecember 4 nü Oting nung atalokba lendong ya lendong madak lendong atalokba mapa ka lir aser iba dak sendakba maparen ya süoki ia bushisüngdanga tekaratiba nung inyaker aibelener nem tapet temerenshi magütsüra, ano, lendong madak lendong atalokba aotsü ana nung lir. Atangji, Oting nung December 4 nü atalokba lendong yabo tamadoktetsüla masü, iba nüktzü yabo mapang talangka makongtsü. Kecha tai maketba nisung, nikongdang mapa nungi pei ki bushia aoba mapang, tesoita mesoit aser tasüngdanga kecha masüngdang ser injang khaloktsüba mapaji meimchir taküm anema inyakba yiar mapa ka lir. Item yiaritemji nüchipur lokti nung alitsü metemsü, anungji parnokji pur balaka nung ayutsüla. Ano,pei kinunger aser adianu mapa nungi menua kidangi meshilangba agi ratamataa parnok bushii aortem rongnungiang teimba kasetba aser yirutsübaji nisung mejangjateti aibelena kaset ta asüba o nungbo melamelaa metemtetsü. Tang tashi nung sasaba dak alaka center government nungi tai maket nisung kasetba atema taidok meshiba osangbo mali. Ajisüaka, meyiper tasürtem tai kümtsütsü merangbaji meimchir mulungjang nungi adokba shisatsü masü. Iba ama temulungjangji memelenshi nungbo, ano, item jagibo tai maketba zü tokshitsü kecha nungnanga mebilemetsü. Atangji, alima nung maibelener mali, aibelentsüji nisunger yimya saka aibelena nisung paikaji khaseta bener ajentsü merangba nungji tebilemba tamajung aika reprangteter. Parnokji tebushir mali ser tebushi moi toksü asünungbo, tang yabo parnok tamasa khasertem otsü balaka melener lila. Ashiko, parnok ajak telongpur süoshi agir, parnok ket nungi apuba injang prangpong dena sepaitem jagi sayur lila ta shisabolua bilemer. Kodang item tatalokba ajakji angadanga bilemdangdir, mezüng asürtem kümzüki aoer rongnung tasürtem aser yirua alirtem ajak nemji tasü tait sempet agütsütsüla. Item jagi pei taküm samaa mapayui, India sepaitemji tasü mangtemji bener jena moudaktsüi soitba agi tanü asenoki shitakba tatalokba meteter. Iba tensa tiaji kodang bilemdangdir, nisung khaseta bener jena ooya aliba sepai garitem sota aputsübaji mapa temela masü. Ibaji mashi nisungibo meinyaktetsü. Item inyakeritemji tasü tait nisungtem lir. Parnok aliba agi tsükchir nem pei adianu tasü mang bener moudaktsüi kümzükogo. Asenoki itemji, taküm alirtema aser tasürtema tushia tenüng asangtsü tim. Parnokji tasü tait nokinketerem asütsü. Parnok khasetba otsü yabo nübortemi yakta amadokla otsü masü, parnok taküm tenla indang jembili, nübortem tali jashili ta tensa tamajungba- tamajungba kuma oagi yimten telemtetba agitetba ajanga Nagaland nung Armed Forces Special Power Act mali akümtsü melena, sepaitemi iba ozüng amer tai maketba nübortem dak tali tapong inyakba agi Naga yimten tebilemetsü tatem kuma latettsüang tasakba akümtsü. Item ajakji rajema Nagaland nung yimsüsürtemi center nung yimsüsürtem den jembia tekaratiba nung tai maketba nisung khasertem dakjibo parnok mapa dak alang temerenshi agüja nübortem dang sayutsüla. Iba jagi nübortem mulung anisungzükba dang masü saka tarutsü nung tang amaji sepaitemi pei tenüng agitsü atema ozüng tamajung nung ajemdaker tai maketba taküm mesamatsütsü aser reshikangshi masütsü. Atangji, AFSPA ozüng ya tetsübuttsüka lir. Ibaji asenoki asenok dak atalokdang dang meteter. Iba ozüng yagibo, kecha kuli maka ser temulung malemba kija agi yimkong samatsütsü. Tanü asenoki ibaji jangjaogo, anungji iba ozüng ya malitsüsa asenok longjemer tanen maka inyaksüla. Iba tangatetba nung, Nagaland tatar senden nung benoka jembitsü atema tatar senden tan ita December 20 nü ayongzuka lir. Iba senden nung tatartemi India sepaitemi parnoka mezüngshii nübortem anema inyakbaji kanga sashia aitsütsüla aser Nagaland nungbo tatar senden nungi temelaba magii, India temzüng arla 371 A nung shia aliba ama, kecha temzüng ozünga mamshitsüla ta ajangajanga metetdaksütsüla. Nagaland nung yimjung aliba o AFSPA na ya meputep, kechiyong AFSPA yabo yimjung alidaka aser malidaka menüngdaker. Alima asünungji ozüng raksartem alitsü, saka tanü arem aser kiset shirurutema taküm alitsü temeten jembiba putu ka nung, ozüng raksaba tenüng nung tenünga masüngdangi tai maket nisung ka khaseta yutsü nungbo, asenok taküm jenjangji shiruru danga teküpokba asütsü. Joko, Nagaland nunga lendong masü shitakba yimjung aginür. India nungertemi tashiyim agi aser tsübudaktsüba agi Naga nunger mulungjang akoktsü asübo koker lila, anungji India-ia India meimra Naga nungertem dang akümtsüba meima amshitsüla. Tanü putu nung balaka Indiai Naga nungertem den jungtepa alitsü melen tsükchitepra, atangji Naga nungertem kanga timatemtsü saka alima tsüngdangbo Naga nungertem dang nungibo India takoksaba akoksatsü.

## OLEMSABANG

### TSÜNGREMER MANGDANG SENTONG MEDENI KHRISTA AROGO ASER MONGDANG MOTET

~ BENDANG IMSONG, SOCIAL ACTIVIST, MOKOKCHUNG

Khrista nung temeim amangbaburtem, 2017 Nov ita nung Tsüngremlar ka ajanga Aoertem asoshi jungkai adoka Tsüngremi la dang mangdang sayuba lemsateper. IMPUR arogo nung tenzüker aser ABAM Mongdang tenzüker kar den Tsüngremi la dang sayuba khuret onüktem lemsatepba sarasadem," Anung nungi milong ka alua IMPUR tenla ki kilem nung tsük aser mi jaki kilemji rongga rongga Watsü ka rongtet aser lai yamai ashi, mapang talangka ni iba tenla ki nung atsüka liasü saka dang ni iba mi agi rongteta adoker ta shi". Tetezü asenok melungjang nung satan yimsu sudaktsüba ajanga tanü tashi Yisu Osang tajung Naga limai arur amangbaburtem tsüngta nung meputep aser telemsa adokdaksüba, iba jagi küli sayur. Anungji ni nungi shir amangbaburtem ajaki shilem agia iba temenen tongpang tuluji koktetsü asoshi tanga lemanng kecha mali saka Tsüngrem dang tatok meshitsü sentong ABAM ajanga yamai ayongzük nung koda? tepilemba lemsateper. Melongkimong nung mezüngbuba telumiba sentong akatsü aser Melongyimsen ajanga IMPUR nung sentongji tempangtsü, iba mapang Tsüngremi kechi sa jungkai adoka sayudir item temenentemji nangzuka sarasademtsü telumiba agitsü ayongzük. Laishibai yamai ashir, MATHI 11:28 Nenok tepelemer aser khureta abener ajak kü dangi arung aser ni nenok nem anisungzük agütsüdi. OBA TSÜNGREM TANÜ ALIMA NUNG OCHI ASER TEYAZÜ NA RARAR, ANUNGJI NAI OZÜ MONGDANG ASER AROGO TENZÜKERTEM OCHI POKÜMDAKJANG ASER SOLOMONI TANÜR TETSÜ ANA TANÜR RAKTEPDANG TASOLA TETSÜ NEM AGÜTSÜBA AMA SHISATSÜ TENZÜKER NEM AGÜJANG AMEM.

### O SEMLOK

~P. Renthly Jamir

I Temjen Tzüdiri Tir Yimyim aser Ao Milen adok 17-11-2021 nung LEPER TEJEN MEKAKSHITEPI KOTAKI AOTSÜ MERANGTEPTSÜLA ta züluba nung ajemdaker kü tangatetba tatsüka zülur. Pai züluba oren ka nung yamai zülua lir "Anungji Molungkimonga Molungyimsena aser ABAM ajak 2022 küm Ao Limai Khrista yimsü Tajung Arur Küm 150 abensaba Wasünung (Jubilee) kodang mungnudir mungdaksütsüla". Iba oren nungi angatetba agi item telok asem, Molungkimong, Molungyimsen aser ABAM ya karbo Jubilee amungtsü langka tesotba ali ama angateter. Akimapang Aori ken yamaisa atenba menungrar.

(Ao Ken Kaket 1970 Edition, N0. 158)

Tepelatsü ken ka angang

Ajakleni osang yokang

Alar masü ni tang nüji

Iba kümi Aor Jubilee

Süra I Temjen Tzüdiri züluba yagi Aor ajak Juilee masü ama angateter. Ao Limai Dr. Clarki 1872 Khrista yimsü bener aruba 2022 küm 150 abensaba amungtsü jepju shi ama telong telong bensatsüsa mesüi amung tajungba ta bilemer. Onoki angazükbabo Dr. Clark Molungkimong tama arua lir Molungyimseni ai ano Impur li mesema tua ali (ABAM). Anungji asem ya Tebu, Techir, Tanela Temeshi ama pilatsü makok. Ano Molungkimong aser Molungyimsen ana ya Longtrok O Chungliyimti na Aor lipok otsü nung pilatsü makok ama medemdanger. Naga lima kin balala nungi dang masü England, America, Germany (foreigners) aiben lima penzür (tourist) arur aser Molungkimong, Molungyimsen anaprongla semdang aor. Kodang Chungliyimti semdangi aor Longtrok dena repranger arur. Item ya tatishitsü bena arua sayur.

Ao limai Khrista yimsü arur akidang tamangertem tia tanü ama mali asü. Mojingi mapa inyak ken kenbo iba ymsü samatsüsa tesashi yipru agi anokshir alitsü. Tamangertem kangasa amok merena merenshir alitsü. Oda yimsü ang mamangli ta tatalokba aikasa ataloker alitsü. Peteria asem ben tashi Yisu menangzük tet nung koda? Mapang kakabo par yimdak tamanger kata mali ta atalokba tashi alitsü. Onok yimer (Changtongya) tamanger kibong aika lirsürnung kata mali tasür küm 7 (tenet) Ao Mungdang nungi jentok. Saka küm 7 ji züngtoker onok arogo otsü maor. Nisung ka tzsener Arogo nung entok saka pa agizük dang tzsenerba kümji mesüktoktsür. Alar tashi chioktsüba Jubilee süra asen lima aki tejen putu tamanger tiaji shisadangerang tai temeten kangabo mebushitepi I Temjen Tzüdiri ashiba amaji ken nung atenba ama Jubileeji amungtsüla ta tangatetba shisa lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# KBAYD pur 67 buba General Conference kaogo



Medziphema Sub-division kübok Sirhima yimtsüung nung December 12, 2021 nü Kuki Baptist Association Youth Department (KBAYD) pur 67 buba General Conference aser Cultural Events sentong tatembangba agidang tangokba noksa ka yangi angur.


**Dimapur, Luchii/Dec. 13 (TYO):** Kuki Baptist Association Youth Department (KBAYD) pur 67 buba General Conference aser Cultural Events sentong Medziphema Sub-division kübok Sirhima yimtsüung nung December 10 nungi 12, 2021 anogotem kaogo. Iba mungdang ya "Be Reconciled" (2 Corinthians 5:18-20) omen nung ajemdaker Baptist Youth Endeavour (BYE), Sirhima ajanga ayonga liasü.

Asemnü sentong nungya NBCC Youth Secy., Rev. Vikuo Rhi aser taoba KBAYD Youth Secretary, Tracey Kipgenwere na tongti o jembir liasü. 67 buba KBAYD General Conference ya KBAN Executive Secy., Rev. Lamkhotong Singson ajanga sarasadema tenzüksü aser Mon district kübok Oting yimtsüung nung tai maket nüburtem tepsetba atema akum agüja candle light service ka agia liasü.

Iba mungdang nung Ichthus Worship Team ajanga tekülem mapang agi aser kasa sentong nung sobaliba tsüingsang, saisapong balala aser tetsü-tebou ken atenba nung tetoktepba agia liasü. Iba mungdang ya KBAN Executive Secy., Rev. Lamkhotong Singson-i sarasadema tembanga liasü. Mundang nung Kohima, Dimapur aser Peren district tem nungi KBA arogo indang unit 9 nungi nübu 250 shi arua dena liasü.

# Nigeria nung pua bener aosang pastor Rev. Dauda Bature tepset

**Abuja, Luchii/Dec. 13 (Agencies):** Fulani shiruru metsürtemi Khristan pastor ka Nigeria north tsütsü Kaduna yimti tezülen pua bener aoba sülen pa alangzüksü sen meshir tepset, ta osangtem ajanga ashi. Hayin Narayi, Kaduna state nung aliba First Evangelical Church Winning All (ECWA) nungi Rev. Dauda Bature ya Ungwan Kanti yimtsüung nung par alu nung mapa inyaka alidang Muslim Fulani herdsmen temi November 8 nü pua bener oa liasü. Pa asüba osang ya December 9 nü angazük, ta arogo tenzüker temi ashi. "December 9 nü pastor apurtemi par arogo (ECWA) lenirtem dangi call sür parnoki sen tali bener marutsütetba ajanga tepsetogo ta metetdaksü," ta Christian Association of Nigeria (CAN) indang Kaduna state chapter nung mendenpuba, Rev. Joseph Hayab-i osangbener dang text message ka nung ashi. Pastor Bature kinungtsü, shiba kasa teloki pua bener orr December 6 nü chiok, lai arogo nung lenirtem dang la kinungbui pa apurtem den Khrista indang osang tajung lemsatep aser parnok tai atoktsü atema sarasadem ta ashi, aser iba yongji parnok ain adoka pa tepsettsü telemtetba agia alitsü südi, ta Pastor Hayab-i ashi. Pastor Bature kinungtsü ya la kinungbu alangtsü atema



Rev. Dauda Bature

November 18 nü sen bener otsüba mapang pua ayu, ta osang ajanga ashir. La ya December 6 nü chiok, ta arogo lenirtemi ashi. Pastor Bature apurtemi pa alangtsü sen meshiba sülen pa asüba osang ya December 9 nü arogo lenirtem nem metetdaksü, ta yangji alirtemi ashi. "Onok atema ibai mangyimba mapang ka lir. Ita ka shi jakdang pua bener aosang Rev. Dauda Bature alangzüksü atema pa apur Fulani shiruru metsürtem nem sen agütsüba sülen December 9 nü sür aliba metet," ta yangji alir Anthony Abednego-i osangbener dang text message ka nung ashi. Kaduna yimti nung pastor Ayuba Azzaman-ia sangdong ka nung Pastor Bature tepsetba indang shia liasü. Pastor Bature ya Nariya-Maigiginya Zone, Rigasa District of Igabi LGA, Kaduna state nung CAN indang local chairman ka ama inyakogo, ta

ECWA züingsem Ezra Hosea-i ashi. "Pa ya Chikun Local Government Area, Kaduna State nung Ungwar Kanti-Pakah Kadi highway anasa par alu nungi pua bener ao," ta Hosea-i ashi. "Rev. Bature asüba osang angashia Tudun Wada Local Church Council (LCC) of Kaduna ECWA Central District kübok ECWA Hayin Narayi nung alirtem aoksa," ta ECWA züingsem Ishaya Musa-i ashi. Taoba küm alima nung Khristanpur timtiba pua bener aoba linüktem rongnung Nigeria ya tematiba lir, kong nisung 990 apu, ta Open Doors' indang 2021 World Watch List ajanga ashir. Taoba küm (November 2019-October 2020) tamangba yimsü mechi Khristanpur timtiba tepsetba linükji iba ya alitsü, kong tamanger 3,530 tepseta liasü aser 2019 küm nisung 1,350 tepseta liasü, ta ashi. Tekülem ki amakba mesüra shibangtsüba tsütsü Nigeria ya jenjang tasembuba nung lir, aser par jakdang China aser tesülen Pakistan lir, kong iba ama timtem 270 ben ataloka liasü, ta Open Doors' indang list nung shia lir. Taküm World Watch List nung Khristanpur alitsü asoshi tamajungtiba linüktem rongnung Nigeria ya taoba küm jenjang 12 buba nung aliba jenjang 9 tongogo.

# ANOGO ABEN TSÜNGREM DEN

## Ne tesangwa kari nüngdaker

"Yamaji nisungtemi nenok mapa tajung ngua,  
Kotak nung aliba nenok Tebu  
sentsüwangshidaktsütsü asoshi parnok madang  
nenok tesangwaji jungkai adokdakjang."  
(Mat. 5:16)

Khenü anogo tetsür kati tamanger tajung ka ajurua kanga pela-a jembi. Lai yamai ashi, "nai nibo memetetsü, saka nibo na meteta lir. Kechiyong nai anogoshia osang kakat nung Tsüngrem O nungi tajungshi O züluba ni azünger. Khenü ni kü taküm tembangtsü bilema alidang nai züluba osang ajanga kü taküm kümzük. Iba osang ni mezüngshi asübo ni tanü yangi taküm melila" ta lai lemsatepba liasü.

Yisu-i ashi, 'nenok alima tesangwa ' (Mat. 5:14). Kodang asen dak Khrista tesangwa ya-a lidir tangar tammang nung koda masür nemzürtem asoshi teyari tulu akümer. Kodang asen dak Tsüngrem tashi angaba lidir asen dak tesangwaji tsükloker. Kibubai asenok mapa tajung teti tsükloka alitsü ashir, kechiaser kodangsa asenok mapa tajung inyakdir aji tesangwa tsüklokba temaitsü lir. Tsüngremi ne nem kechi sempet, tejangraba, aser tajungshiba agütsür iba jagi tangar kar asoshi tajung inyaktsü anogo tenzükung. Tezülurtemi zülüang, akartemi tangar den lensatepang, kenteneri Tsüngrem temeim indang tenang... Yamaji kar taküm asoshi naji tajungshiba südakjang. Tanü nai shiba sangwadaktsütsü?

### SARASADEM

Kibuba Yisu ni kü lenmang nung ne temeim tesangwa teti tsükokdi. Kar tammang nung lira parnok dangi ni aniang. Amen

# Hindu nunger dang Khristmas benjong mamungtsü amokmeren

**Luchii/December 13, 2021** külemi inyaker. Parnok kanga (Agencies): Northern India kumdangtsüla, ta Pudaite-i nung Hindu nunger lenir kati ashi. Hindu nunger kar danga "Parnoki kecha inyakang teinyak, mapang shia Khristanpur amungtsü Khristanpur anema tiazi nung tai tongloksür. Asenoki iba ama tatalokba ya India tesem ajungalen angur; tashiyim agi tamangba yimsü melendaktsü ta tiazi nung tai tongloksüba mesüra senotsü teyari agitsü mechi tamangba yimsü melenba. Iba ama tensa nung teti iba ama amokmeren ya arur." Northern India nung nütsüung aikati Khristmas indang osang tajung angashitsü asoshi sarasademang. "Iba ama mapang danga yimsü (Hindu aser Muslim) nungi Khrista dangi aruba molungjang lapokjang ta sarasademjang," ta Pudaite-i ashi. Khristanpur aser Hindu nunger dak Hindu nationalist temi timtem magütsütsü asoshi sarasademjang. Tsüngrem dang parnok sentong raksajang aser azüdokshi nungi parnok temolungjang agienang ta shiang, ta pai ashi.

**OLONG PAITEP # 6026**

|    |  |   |    |    |  |    |   |    |  |   |
|----|--|---|----|----|--|----|---|----|--|---|
| 1  |  | 2 |    | 3  |  | 4  | 5 |    |  |   |
|    |  |   |    |    |  |    |   |    |  |   |
|    |  |   |    | 6  |  |    |   |    |  | 7 |
|    |  | 8 |    |    |  |    |   |    |  |   |
| 9  |  |   |    | 10 |  | 11 |   |    |  |   |
|    |  |   |    |    |  |    |   |    |  |   |
|    |  |   | 12 |    |  |    |   | 13 |  |   |
|    |  |   |    |    |  | 14 |   |    |  |   |
|    |  |   |    |    |  |    |   |    |  |   |
|    |  |   |    |    |  |    |   |    |  |   |
| 16 |  |   |    |    |  | 17 |   |    |  |   |

- |                                  |  |                                      |  |
|----------------------------------|--|--------------------------------------|--|
| <b>TIPILEN</b>                   |  | <b>LANGTSÜNGLEN</b>                  |  |
| 1. Nisung jenti - (5)            |  | 1. Tenük telong - (9)                |  |
| 4. Tsük rudenba - (5)            |  | 2. Committee dang ajar - (5)         |  |
| 6. Temzüng tesashi - (5)         |  | 3. Yagi ki okdoker - (7)             |  |
| 8. S _ _ _ i - (3)               |  | 5. Yim lenmang - (5)                 |  |
| 9. Nisung telesa - (3)           |  | 7. Temoatsü keter meyipa aruba - (9) |  |
| 10. Anogoshi - (4)               |  | 11. Kanga junga menemba - (7)        |  |
| 12. Ajanga aor - (4)             |  | 12. Majinü - (5)                     |  |
| 13. Tsük rizüngdak - (3)         |  | 13. Tzuma nung senzuba - (5)         |  |
| 14. Tebang nungi adokba - (3)    |  |                                      |  |
| 16. Süngdong tatembangtiba - (5) |  |                                      |  |
| 17. Meputep - (5)                |  |                                      |  |

**OLONG PAITEP # 6025 TELANGZÜBA**

- |   |  |
|---|--|
| <b>TIPILEN :</b>                          | <b>LANGTSÜNGLEN :</b>                      |
| 2. Bangsemo, 6. Tiptem, 8. Jen,           | 1. Yipten, 3. Nüja, 4. Sangro, 5. Milen,   |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong,   |
| 16. Angati, 17. Odi, 18. Azü,             | 13. Ajizük, 14. Aitsü, 15. Tasa, 16. Aina. |
| 19. Sünglang.                             |  |

**ALOKBA O WARAKLA NA RARATEPER :**

**Alokba** : Nenok tetsürji tapu tapu purashiyonga kibong nungji ni teburji to, tekolakjibo ni aja, ni kechi molung ajiangsa asütsüajai.

**Warakla** : Hejai, na tekolak süra nia tekong ako ya.

**Alokba** : Tekongji tu tekolak küpok akoti.

**Warakla** : Ni tekong asüba agi na tekolakjia ni meyipnüleni ang meyiptsü nung koda!

**Lilir : WhatsApp**

**TANÜBO NAI LANGZÜANG**

Q. Koba Union Ministry ajanga 'Atal Vayo Abhyudaya Yojana (AVYAY)' ta nungja agütsüba scheme mapa kuma inyaktsü?

[A] Ministry of Women and Child Development  
 [B] Ministry of Social Justice and Empowerment  
 [C] Ministry of Rural Development  
 [D] Ministry of Minority Affairs

(Taruba adok nung onoki langzüksü)

**YASHI ADOK TELANGZÜBA : NASA**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lishi**  
 (n) ali tayi (mud)  
 \* Nepalitsürtemibo **lishi** agi ki kanga junga menoka merüktetter.

**Lishi**  
 (v) külemi alitsüsa akümba ( could live together)  
 \* Ozü jala nisung tajung den **lishiba** agi jangratema alir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

**Tepela Tasoba Anogo**

1. Tenüng : .....  
 2. Tasoba anogo: .....  
 3. Küm : ..... 4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA**

**ALIMA NUNG TEMEKONGTIBA TESEM KAR:**

- Vostok, Antarctica
- Plateau Station, Antarctica
- Oymyakon, Russia
- Verkhoyansk, Russia
- North Ice, Greenland
- Eismitte, Greenland
- Snag, Yukon, Canada
- Prospect Creek, Alaska, USA
- Fort Selkirk, Yukon, Canada
- Rogers Pass, Montana, USA



Vostok, Antarctica

**SUDOKU # 6067**

|   |   |   |   |   |   |   |   |   |  |
|---|---|---|---|---|---|---|---|---|--|
|   |   | 9 | 6 | 3 | 7 | 5 |   |   |  |
| 3 |   | 8 |   |   | 5 |   | 4 |   |  |
|   |   | 1 |   |   | 7 | 3 |   |   |  |
| 6 |   |   | 5 | 8 | 4 | 9 | 1 | 7 |  |
|   | 8 |   | 3 | 9 | 1 |   | 6 |   |  |
| 9 | 1 | 4 |   |   |   | 8 |   |   |  |
|   | 3 |   | 4 | 9 |   | 2 |   |   |  |
| 8 | 5 |   | 1 | 6 |   |   |   |   |  |
| 4 | 9 |   |   | 8 | 1 |   |   |   |  |

**TELANGZUBA # 6066**

|   |   |   |   |   |   |   |   |   |   |   |
|---|---|---|---|---|---|---|---|---|---|---|
|   |   | 2 | 8 | 5 | 6 | 7 | 9 | 4 | 1 | 3 |
|   |   | 7 | 6 | 1 | 8 | 3 | 4 | 2 | 9 | 5 |
|   |   | 4 | 3 | 9 | 1 | 5 | 2 | 6 | 8 | 7 |
| 6 |   | 6 | 4 | 3 | 7 | 9 | 8 | 1 | 5 | 2 |
|   | 8 |   | 1 | 5 | 2 | 4 | 6 | 3 | 8 | 7 |
|   | 9 | 1 | 4 |   |   | 8 | 9 | 7 | 2 | 1 |
|   | 3 |   | 4 | 9 |   | 2 | 5 | 7 | 8 | 3 |
| 8 | 5 |   | 1 | 6 |   |   | 3 | 1 | 6 | 9 |
| 4 | 9 |   |   | 8 | 1 |   | 9 | 2 | 4 | 5 |

**OJANG LUTEP # 5613**

- DAKONG :
- MDAMEKÜNGI :
- BIJEMA :
- ERAS :
- INDIYAKR :
- SEAN :
- SASA :
- NDLEONG :
- OKJAER :
- NGDA :

**OJANG LUTEP TELANGZÜBA # 5612**

TANGARI INYAKBA DANG MATAI PEI SASAA TAJUNG AJITETTA INYAKTSÜ MERANGANG

**TAN HOPTA ATEMA - KOMA SÜLA ?**

Q. Nagaland nung India sepaitem ya melidaktsü nunga koma süla ?

Olong 20 shi nung December 17, 2021 tashi nung iba telangzuba ya onok dangi (e-mail - tiryimiyim@gmail.com) :  
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.

# PM Modi-i Kashi Vishwanath Corridor Phase 1 lapoktsü



Ato Kilonser Narendra Modi-i Varanasi nung pa indang parliamentary constituency nung aliba nūburtem den ajurutebpa noksa nung angur. Varanasi semdangba mapang PM Modi-i Kashi Vishwanath corridor lapoktsüogo.

**New Delhi, Luchii/December 13 (Agencies):** Ato Kilonser Narendra Modi-i Hombarnü Uttar Pradesh kübok temeshi yimti Varanasi nung Kashi Vishwanath Corridor mezüngbuba phase lapoktsüogo. Modi, shiba tang pa indang parliamentary constituency Varanasi semdangba mapa ka lir, pa iba yimti nung aliba nūburtemi pelashishia agizüka liasü.

Modi pa o "Har, Har Mahadev" agi tenzük aser ashiba agi, nūburtem Kashi-i aiba sülen talenba ajak nungi salatsür.

Ato Kilonser-i ashiba agi, iba corridor ya merataket 'Bhavan' ka dang masü saka India indang 'Sanatan' cultural traditions temaitsü ka lir.

"Kashi Vishwanath temple temeket, koba 3000 square feet shi dang liasü, iba ya tangbo 5 lakh square feet shi kümogo. Tangbo tamanger 50,000 nungi

75,000 tashi-iba temple aser temeket semdangtetsü," ta Modi-i ashi.

Paisa, iba corridor yanglurtem dang kanga pelaba lemsatapa liasü.

"Covid-19 wara pokteter liaka mapa inyakertemi parnok mapa anüngdaka meyui maneni inyakogo," ta Modi-i ashi.

Iba corridor melapoktsü tsüngda Modi-i mapa inyakertem den sensak asem aser parnok mapa tajung asoshi tenüng asangba temaitsü parnok dak naro proklokja liasü. Iba den pai mapa inyakertem den noksa- a agia liasü.

Ato Kilonser-isa, corridor melapoktsü tsüngda, Kaal Bhiarav temple nung sarasadem aser temeshi Ganga ayong nung tzüicokoa liasü.

Kashi Vishwanath Corridor mezüngbuba phase ya sen crore 339 intoka yangluogo.

Iba mapa atema nūngshilong ya Modi-i 2019 küm March ita 8 azüngja liasü.

Ato Kilonser office sangdong ka ajanga ashiba agi, iba project kübok mezüngbuba phase nung ki 23 lapoktsüogo. Item kitem yagi Kashi Vishwanath Temple semdangba temeshi aine aoertem nem facility balala agütsütsü, kong yatri suvidha kendras (tourist facilitation centre), vedic kendra, mumukshu bhavan, bhogshala, city museum, viewing gallery, food court nung amala densema lir, ta PMO-i ashi.

Uttar Pradesh nung election agitsü ita ka dang anunga lia Kashi Vishwanath Corridor lapoktsüogo, kong chief minister Yogi Adityanath-i anir Bharatiya Janata Party (BJP)-i tanabuba term sorkar kümteetsü atema merangdar.

# Rahul Gandhi-i CBSE aitsü

**New Delhi, Luchii/December 13 (Agencies):** Congress lenir Rahul Gandhi-i Hombarnü class 10 English paper nung comprehension passage dak sendakba nung CBSE aitsüogo aser ashiba agi iba ya tesempatsüka aser lanurtem tarutsü aser morale raksatsütsü atema RSS-BJP inyakim ka ta ashi.

CBSE class 10 English question paper nung iba comprehension passage ajanga "gender stereotyping" aser "regressive notions" pusemer ta shia taitüsü aika adokogo aser iba ajanga board-i ken o ya subject mongintem dangi abentsüsa aküm.

Twitter ajanga Gandhi-i, "CBSE tatidang paper tem ya tang tashi nung kanga tasak aser English paper nung comprehension passage tesempatsüka liasü. Lanurtem tarutsü aser morale raksatsütsü atema RSS-BJP inyakim ka,"

ta tweet asü.

"Tanurtem takok tashi tajungtiba agüjang. Meranga inyakba tajangzük lir. Tesempatem ajanga kecha majangzükter," ta Gandhi-i ashi.

Congress tir Sonia Gandhi-i iba ken o ya Lok Sabha nung benokogo.

Honibarnü agiba class 10 tatidang nung question paper nung comprehension passage ka liasü kong "tetsürtem nem nüjiso agütsüba ajanga tanurtem madak tsürapur tazüokba raksatsüogo," aser "la kinungboi mulungba agizükba ajanga dang tetsü kaji tanurtemi akhümtsübutü," ta zülur liasü.

Iba passage nung olong balala social media nung prokshiogo, aser tetsürtem ajemzüksüba aser regressive opinions pusemba atema nūburtem aikati board aitsüogo aser hashtag "CBSE insults women" ya Twitter nung trend südar.



Srinagar tezülen Rangreth nung telungpurtem den mangatettep adokba sülen longkak aitertemi lenmang nokdang aliba Security forces temi mesapokba noksa nung angur. Iba khatapba lendong nung telungpur ana khaseta liasü.

# EAM Jaishankar-i 'Global Tech Summit 2021' nung shilem agitsü

**New Delhi, Luchii/December 13 (Agencies):** External Affairs Minister S Jaishankar-i 6buba Global Technology Summit 2021 nung shilem agitsü, koba Mongolbarnü tenzüksü, ta ministry of external affairs sangdong ka ajanga metetdaksü.

6buba Global Technology Summit (GTS) ya December 14 nungi 16 tashi agitsü, kong cryptocurrencies, encryption, vaccine supply chains, cloud computing, green technology, digital payments, cyber security aser Quad nung science & tech cooperation amala onüktem benoka sensak asemtsü.

MEA sangdong ajanga ashiba agi, wara pokteter aliba ajanga iba sentong ya hybrid format nung agitsü aser tsüngtong arua shilem agitsü atem teshimtetpur kar dang jaoktsü.

Global Technology Summit ya geotechnology dak sendakba nung sentong ka, koba 2016 küm nungi küm shia agia arudar. Iba sentong ya Ministry of External Affairs aser Carnegie India-i ayongzükba agir. Iba summit nung police yanglurtem aser onük dak sendakba nung mongintem technology onüktem benoka sensak asemter.

2021 Global Technology Summit omenji 'Global Meets Local' lir. Jaishankar dak alia British Ato Kiloner Boris Johnson-i December 14 nü

virtual special address ka agütsütsü. Session ka nung External Affairs Minister S. Jaishankar aser ISAS, National University of Singapore Director C Raja Mohan na sensak asemtsü.

Maneni sentong nung Slovenia Minister of Foreign Affairs, India indang Minister for Education and Skill Development and Entrepreneurship, Secretary of State for Foreign, Commonwealth and Development Affairs aser UK indang Minister for Women and Equalities, Minister of State for the Digital Transition and Electronic Communication, France, Minister of State for External Affairs and Parliamentary Affairs of India, Minister of State for External Affairs and Culture of India, Minister of State for External Affairs and Education of India, Vietnam indang Deputy Minister of Information and Communications nungeri shilem agitsü.

Maneni osang ajanga ashiba agi, iba summit nung sessions 50 dak tema agitsü aser ojembir 100 dak temai shilem agitsü, kong industry lenirtem, iba onük nung mongintem aser nungtugu tech company tem densema lir.

Iba sentong nung shilem agitsü atema lintük balala nungi nisung 2,500 dak temai jelia parnok tenüng züngoksemogo.

# India-i Supersonic Missile ka takok ngua tendangogo

**New Delhi, Luchii/December 13 (Agencies):** India-i Hombarnü Odisha kübok Balasore tzüküm nung long-range Supersonic Missile Assisted Torpedo (SMART) ka takok ngua tendangogo.

Defence ketdangsur kati ashiba agi, iba weapon system ya Indian Navy atema Defence Research and Development Organisation (DRDO)-i yanglutsüba lir.

"Iba system ya torpedo

indang conventional range dang nungi tali anti-sub marine warfare capability ajungkettsü atema design süa yangluogo," ta DRDO-i ashi.

Honibarnü India nung yangluba helicopter-launched stand-off anti-tank (SANT) missile ka Rajasthan kübok Pokhran firing range nung takok ngua tendangogo.


Defence ministry-i sangdong ka ajanga, DRDO aser Indian

Air Force (IAF) nati tendangba flight-testing ajanga missile indang mission objectives ajak tongtetogo, ta ashi. Iba hadir ya IAF atema yanglutsüba aser iba ajanga km 10 tashi pilar aliba target tem dena raksatsüteetsü," ta ministry sangdong ajangasa metetdaksü.

Iba masüdag anogo asem tsüngda Extended Range Pinaka rocket system (Pinaka-ER) kanga takok ngua tendangogo.



Lok Sabha speaker Om Birla-i, 2001 küm Parliament amakba lendong nung asürtem nem akhüm tetushi agütsüba noksa nung angur. Vice President M Venkaiah Naidu-a noksa nung angur.



South Korea tir Moon Jae-in (tabelen) aser Australia Ato Kiloner Scott Morrison na Canberra nung Parliament House nung tangokba noksa nung angur. Moon tang anogo ana atem Australia semdangba mapang lir.

### Denmark nung arishi küm 40 temapur nem vaccine dose 3buba agütsütsü

**Copenhagen, Luchii/ December 13 (Agencies):** Danish health ketdangsürtemi Hombarnü sangdong ka ajanga ashiba agi, Omicron variant menatepa aoba nokdangtsü atema linük nung arishi küm 40 temapurtem nem Covid-19 vaccine dose tasembuba agütsütsü.

"Kanga dang kara menatepa aoba Omicron variant poktetba ajanga Danish Health Authority-i arishi küm 40 temapurtem nem vaccine dose tasembuba agütsütsü telemtetba agiogo, anungji parnok tanabuba dose agiba sülen ita pesüser tesa dang lir tasembuba agütsü," ta health

authority-i ashi. "Dose ana tsüingda mapang ajemtsüba ajanga asükwa aruba mapang lendong nung alirtem nem tekümzükba tali agütsütsü aser nüburtem immunity tajungba kümdaktsütsü," ta director Soren Brostrom-i ashi. Vaccine tanabuba dose agiba sülen ita asem lir dose tasembuba agiba ajanga timtem kecha madoktsü aser teyari agütsütsü, ta European Medicines Agency (EMA)-i taoba ita shiogo. UK-ia Deobar nikongtsütsü booster dose takaratiba nung agütsütsü aser taruba küm matong tsüingda iba vaccine agütsü atema arishi küm 18

temapurtem ajak nem maangka agütsütsü, ta sangdongogo. Deobarnü tashi nung Denmark nung nisung 2,471 Omicron variant potetogo. Iba linük nung nütsünyongsük million 5.8 lir aser arishi küm 5 nungi temapur shilem 80.6 nembo vaccine dose anaprongla agütsüiogo. Omicron variant ya Delta variant dang nungi kanga takaraba menatepa aoer aser iba ajanga vaccine agi mapa kanga junga minyakaker saka tashidak keta aliba temaitsü kanga sashirabo mesayur, ta World Health Organization-i Deobarnü ashi.

### Kabul passport office tekolakbai atasatsü mepeshi

**Kabul, Luchii/December 13 (Agencies):** Kabul Passport Office tekolakbai linük toktsür aotsü yongyatepba Afghan nungertem dang atasatsü mepeshia metetdaksüiogo. Office inyakyim shibanger ita ka shia liaka nüburtem meyirejang aika Passport atema office kima maneni adenshir. Asükwa agi menepa aruba den August ita Taliban-i Afghanistan atsüingba aser bendanglen nungi teyari anenba ajanga rongsenketzüng nung timtem tulu adokba sülen lisopurtem linük toktsür aotsü atema kanga aritepdar. "Onoki office lapokshitsü atema kanga merangdangogo saka hadirtem agi maneni meperir," ta passport office tekolakba Alam Gul

Haqqani-i ashi. Anogoshia application meyirejang aika process asüba ajanga taoba ita biometric documents agütsüba equipment raksaba sülen office shibangtsüsa aküm. Office joko shibanger hopta ishika saka nisung noklang aika document file tem bener anogoshia office-i arur. "Office yakta lapoktsü aser onoki application ajak agütsütsü. Nisung shinga onok office temulung mesüi meyoktsü," ta Haqqani-i ashi. Pai, nüburtem dang office inyaksangshi metenzük tashi office-i marutsü mepeshia metetdaksüiogo. "Iba metongmejen atema kanga sasa bilemer, kechiyong nüburtem aika kangshitepdar.

Parnok rongsen lalur aser idaki amajok nung arua nokdaker," ta paisa ashi. Provincial passport offices aika lapoka lir aser Kabul nung ketdangsürtemi anogoshia passport 2,000-3,000 shi process südar, ta pai ashi. Ajisüaka Kabul office kodang lapoktsü aji mejangja. Equipment nung tebilemtsü adokba den repsemer ketdangsürtemi ochi mashi inyakyim aser commission agents tem raktoktsü merangdar, shirnoki taa agir mapa takaratiba nung temtsütsü tenangzükba agütsür, ta pai ashi. "Onoki office telung aser tema nung sübokrem agirtem puogo. Onoki linük nung sübokrem agirtem raktoktsü merangtsü," ta Haqqani-i ashi.

### Biden-i Kentucky nung major disaster ka sangdong

**Washington, Luchii/ December 13 (Agencies):** Hokolbarnü tornado yipru agi Kentucky nung teraksatsüba tulu bener arutsüba sülen US tir Joe Biden-i iba state nung major federal disaster ka sangdongogo. Iba ajanga federal teyari talila agütsütsü atema lenmang sadema lapoktsütsü, ta administration ketdangsür kati ashi. Yipru agi Mayfield yimti raksatsüba aser candle factory ka ajunga raksatsüba sülen Kentucky Angh Andy Beshear-i Deobarnü iba osang ya sangdongtsü atema mepeshia liasü.

agi mile 227 nung telongtet nung aliba kiojentem kanga mejungi raksatsü aser iba ya talangba ka Kentucky nung liasü, ta Beshear-i ashi. Democratic party tir yagi taoba mapang iba yipru lendong ya federal emergency ka ta sangdonger liasü aser iba ajanga Federal Emergency Management Agency nem yipru ajanga kongshir alirtem nem teyari agütsütsü atema lenmang lapoktsü, kechiyong nüburtem aika ki raksaba, tzümetsüing, tajemtsü tzi agi anüingba aser power agi anüingba ajanga timtem nung lir. Ajisüaka emergency sangdongba sülen USD million 5 tashi dang intoktsü letetja lir, ta FEMA website-i ashi. Lendong ka major disaster ka ta sangdongba sülen teyari agütsütsü atema kecha latetja mali aser kija aser lokti atema federal assistance program balala agütsür, kong jongdak aser teti atema fund tem agütsüba densema lir, FEMA-isa ashi.

Biden-i iba temepeshiba ya agizük aser Deobarn nikongtsütsü major federal disaster ka sangdongtsü temelaba agüja liasü, ta ketdangsürisa ashi. Angh-i ashiba agi, Hokolbar aonung aitba yipru ya state puti otsü nung yipru tesashitiba liasü aser merang aser long agi yangluba kiojen aser structure tem dena ajareptsüiogo. Yipur ka

### South Africa tir dak Covid-19 tashidak potet



**Johannesburg, Luchii/ December 13 (Agencies):** South African tir Cyril Ramaphosa dak Deobarnü COVID-19 tashidak potetba sülen tang temang anepaludar, ta tir office sangdong ka ajanga metetdaksü. Pa dak tashidak keta aliba temaitsü terara sayudar, ta kasa sangdong ajangasa metetdaksü. Ramaphosa temang mejungi aküm aser tashidak tendangba sülen COVID-19 tashidak menar aliba poteta liasü, ta office-isa metetdaksü. Pa Cape Town nung lokti nungi pilar lir aser South African Military Health Service-i pa temang anepaludar, ta kasa sangdong ajanga metetdaksü. Pai pa mapa ajak hopta tepeyong atema Deputy President David Mabuza nem nongloksüiogo. Arishi küm 69 tain Ramaphosa ya vaccine dose anaprongla agir liasü. Ajisüaka tir office sangdong ajanga pa dak omicron coronavirus variant putet asü masü iba indang osang tejangja magütsü.

Taoba hopta Ramaphosa-i anüolen aliba Africa linük asem semdangogo. Linüktem semdangba mapa pa aser pa sülen anidakertem ajak linük ajak nung COVID-19 tashidak tendanga liasü. Pa sülen anidakertem rongnung kar Nigeria nung covid tashidak potet aser indang indanga South Africa-i meyipa oadok. Ramaphosa ya December 8 nü Senegal nungi meyipa aru. Ramaphosa-i ashiba agi, pa dak tashidak potetba ajanga South Africa nung aliba nübur ajak dang vaccine agitsü nungdakba tatishitsüka sayur aser kümküma alitsü metetdaksü, ta sangdong ajanga metetdaksü. Tashidak agi tonger mozüki oa tashi agi shirangtsüba nungi vaccine yagi tekümzükba agütsür, ta parnokisa ashi. Ramaphosa den Deobarnü ajuruteper aliba South Africa nungertem dang kümdanga alitsü tetuyuba agütsüiogo aser peisasa tashidak tendangtsü aser tashidak keta aliba temaitsü meita atatsü metetdaksüiogo.



Managua, Nicaragua nung staff temi airport nung China nung indang vaccine agizükba noksa nung angur. China-i agütsüba vaccine shilem ka Deobarnü Nicaragua tungogo.

## 12<sup>th</sup> OPEN VOLLEYBALL TOURNAMENT (NAGALAND TELONGTET NUNGI DANG)

28<sup>th</sup> - 29<sup>th</sup> January 2022

Public Ground Mangkolemba nung Falcon Club-i ayongzuka asayatsü

### Sempet Telesma:

1. Mezungbuba jenjang angur nem **Rs. 80000** den Trophy cup

2. Tanabuba jenjang angur nem **Rs. 50000**

3. Semi Finalist ana nem **Rs. 15000** each

Iba den Individual Prizes- **Best Player, Best Spiker, Best Setter** nem **Rs. 3000** agütsütsü.

Iba Tournament nung Club, Yimtsung tejangratemi Phone No. **9365307457** nung tsülatsüteptsü.

**Registration fee Rs. 3000** alitsü.

(BENDANGTEMJEN)

President, Falcon Club, Mba

## GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA

### NOTIFICATION

Dated, Kohima, the 10th December 2021

NO.ED/EL/C/2/MON/2017-18:: Apropos to this office Advertisement of even number Dated 25-09-2020 for recruitment of a Primary Teacher at GPS TotokChingnyu A under the establishment of SDEO Mon the department is pleased to announce that Smti L Toiya, has been selected for appointment to the post of Primary Teacher at Totok Chingnyu A.

(SHANAVAS C) IAS

Principal Director

Issued by DIPR

## 'Miss Nagaland 2021' December 20 nung agitsü

**Kohima, Luchii/December 13, 2021 (TYO):** 29buba Miss Nagaland sentong agitsü renemba anogo atsülanger aser December 20, 2021 nü iba sentong agitsü, ta Hombarnü sangdong ka ajanga sentong tayonger - Beauty and Aesthetic Society of Nagaland (BASN)-i metetdaksü.

Iba beauty pageant, koba December 10, 2021 nü agitsü renem, December 04 aser 05 nü Mon District kübok Oting yimtsung nung tai makar nisung 14, shirnok security forces-i taochi mesayui tepset, Konyak kin den külemi mang-ayimtsü aser asür nem akhüm agütsütsü asoshi iba sentong thinena liasü.

Tang, iba beauty contest ya December 20, 2021 nikongdang 5:30 meta RCEMPA Jotsoma nung ayongzüksü aser contestant 12 agi tokteptsü

renema lir.

Miss Nagaland 2021 nung takok angurtem nem senpet lakh 1 den gift hampers, Brand Ambassador of TaFMA aser State Icon of Election Department agütsütsü. Iba den külemi lai Miss Northeast 2022 nung shilem agitsü asoshi direct entry angutsü.

Kasa tetokteptsü nung first runner up nem senpet 70,000, gift hampers aser District Icon of Election Department agütsütsü. Laia Miss Northeast 2022 nung shilem agitsü asoshi direct entry angutsü. Ano, second runner up nem senpet 50,000 den gift hampers agütsütsü.

Maneni, iba contest nung tanga sub-title takok angurtem nem senpet den gift hampers agütsütsü, ta kasa sangdong nung shia lir.

## Brahma Kumaris-i Peace Angel Rally ayongzüksü

**Kohima, Luchii/December 13, 2021 (TYO):** Brahma Kumaris organisation-i "Universal Peace and Harmony" omen nung ajemdaker December 15, 2021 anepdang 10:30 ako meta Sokhriezie Park, BOC nungi Ura Academy Hall Kohima Village tashi Peace Angel Rally ayongzüksü terenemba lir. Iba rally ya Minister, Higher Education and Tribal Affairs, Temjen Imna Along-i tenzüksütsü, ta sangdong ka ajanga metetdaksü.

Iba rally temer sülen, nikongdang 01:00 ako meta Ura Academy Hall nung Peace

Angel Rally shibangba sentong agitsü, kong Chairman, Kohima village, Heilievio Solo aser PCCF, Forest Department tongti tesemdanger ama jaoktsü.

Iba Peace Angel Rally nung tentet balalai shilem agitsü aser iba rally tembangba tesem nung shilem agir ajak nem Memento agütsütsü. Tejangrar mesüra yimjung meimer nisung mashi kati iba rally nung shilem agitsü akok aser iba rally dak sendakba nung osang tejangja agitsü atema item ph no. 9436604881, 8259819772 nung tongteprateptsü akok, ta kasa sangdong nung shia lir.

## BJP Mokokchung District-i Khristmas jeli sentong ayongzuka amung



Mokokchung, Luchii/December 13, 2021: Jentisang Resort, Ungma nung BJP Mokokchung District-i Khristmas jeli sentong ayonga agiba mapang, Ex Minister aser Mokokchung district indang BJP In-charge, Nuklutoshi Longkumer den sentong nung adenertem külemi tangokba noksa ka yangi angur.

**Mokokchung, Luchii/December 13, 2021 (TYO):** Khristmas benjungmung mongpu agizüka, Hombarnü, Bharatiya Janata Party, Mokokchung District-i Jentisang Resort, Ungma nung Khristmas jeli sentong tuluka ayongzuka amung. Iba Khristmas jeli sentong nung Mandals aser Morchas ajak nungi karyakartas noklang dak tema den alakteta tejaoker ama Ex-minister aser Mokokchung district indang BJP In-charge, Nuklutoshi Longkumer, dena liasü, ta sangdong ajanga metetdaksü.

Iba sentong nung, Nuklutoshi-i Nagaland nung yimtenren tensa indang nung jembia liasü. Pai, mapang talangka nungi jembia aruba Naga yimtenren tebilemstsü, koba tesüiba küm aika atema jembia arur, lenla ajunga nung terenlok lidaktsütsü asoshi iba tebilemstsü yagi nokdanga arudar, ta ashi.

Küm 20 dak tema yimjung asoshi jembia aruaka Naga yimtenren tebilemstsütem bentettsü asoshi ano telemtetba kati maru lir, ta pai sasa

bilemba ka lemsatsep. Anungji, Naga yimtenren tebilemstsü asoshi o jembiba kisung agi masü, saka mapa küma inyaktsü asoshi pai karyakartas pur ayongzuka liasü.

Item tebilemstsü mebentetba ajanga Naga nunger ya tia tensa tamajung ka ajanga odar, anungji tarutsü tajungba asoshi tangatetep/tenangzüktep/telemtetba ka kodang arudir ibaji nüburi agizüksü asoshi pai ayongzük.

Taruba election dak sendakba nung BJP pur teimla indang jembiba mapang, BJP Mokokchung district in-charge, Nuklutoshi-i, aruya aliba 2023 elections nung party-i seat ajak nung tokteptsü imlar, ta ashi. Anungji, iba election atema renema alitsü asoshi pai karyakartas ajungshia liasü.

BJP Mokokchung district, President, Imolemba Jamir-i, iba Khristmas jeli sentong ya mezungbo December 07, 2021 nü agitsü renemer liasü. Ajisüaka, Mon District nung lendong atalokba ajanga iba sentong atsülangtsüsa kümadok, ta ashi.

December 04, 2021 nü Oting yimtsung nung tai makar taküm samartem bilemtetta Imolemba Jamir-i anir teloki minute ka süngjema mokremer akhüm agütsü.

Iba sentong nung adener lanurtem ajungshiba mapang, Imolemba-i, Dr. M. ChubaImsong (BJP National President), shibai bengdanga agüja aser nendaka inyakba ajanga party national set-up nung national ketdangsür temapur den külemi inyaker, pa taküm atishia jembia.

Maneni, iba sentong tali tepor jungdaksütsü asoshi Mokokchung District Disabled Forum (MDDF)-i shilem agia liasü aser BJP Mokokchung indang vice-president, I. Lanutoshi Longkumer-i Khristmas osang lemsatsep.

Iba sentong nung Mahila Morcha, BJP Mokokchung, president, Meyisenla meden liasü aser Tsüngremer temoatsü meshizüka, taoba mapang president Nungsang-i sarasadem. Kisan Morcha president, Tiayanger Jamir-i tayongzükba o jembia, ta kasa sangdong nung shia lir.

## 'Nagaland for Green Christmas' campaign tenzükogo

**Dimapur, Luchii/December 13, 2021 (TYO):** SDG Coordination Centre, Planning & Coordination Department-i taküm küm indang tanabuba 'Nagaland for Green Christmas' campaign tenzüksüogogo, ta sangdong ajanga metetdaksü.

Nagaland nung tzü mopung memenentsü aser ajak ajangzüksü asoshi bilemja Khristmas benjungmung amungtsü asoshi nübur nem angatetdaksütsü aser renemshia lidaktsütsü nung rangloker iba Campaign agir.

United Nations Sustainable Development Goals nung pusema Khristmas benjungmung amungtsü aser Nagaland nung alir nüburtem dang ajak asoshi bilemja Khristmas amungtsü aser iba ya mapa küma inyaktsü ajungmesotsü nükjidong nung iba campaign ayongzükter.

Tang mapang, State atema 'Nagaland for Green Christmas' ya kanga dang nungdakba

mapatong ka lir. Küm nung ajak pelateptsü asoshi iba mongpu ya lir, kasa mapang asenok mekümdangba ajanga tzü mopung atema iba mongpu tim masütsü akok. Ibayongji, asenoki angateta aser shisadanga State ajunga nung tzü mopung memenentsü Khristmas ya süsümedema aser tepor junga ayongzüktertsü akok.

Iba benjungmung atema asenoki aliba süngdongtem nungi tenzükba achi-ajemtsü atema aliba chiyongtsü tem tulu mesüra tilaka danga süang, item yagi temelenshi tulu adokdaksütsü akok.

Asenoki teti inyakba nungi tenzükba, osettsüset aliba, osettem komaka amshir aser amshir sülen item oset indokba junga shisadangtsüla; aser itemji angateta inyak nungang temelenshi adoktsü.

Maneni, iba campaign shilem ama, SDG Coordination Centre-i 'Green Christmas

Contest 2021' lapoktsüogogo, koba December 25, 2021 tashi application agizüksü. Taküm küm indang contest atema omenji - 'Minimalism' asütsü.

Nagaland nung alirtemi pei pei tesem nung 'Green Christmas' amungba indang yimyatem sayutsü asoshi noksa 1 nungi 5 aser video (minute ka dak tema masütsüla) ka lemsateptsü akok. Kasa inyakyim ya #NaglandForGreenChristmas#NaglandSDG den Social media sabang nunga lemsateptsü akok.

Takok angur asem nem senpet 10,000 (10,000 each) agütsütsü. Iba contest nung shilem agitsü asoshi -<https://bit.ly/flreenchristmascontest2021> nung log in süang. Iba contest dak sendakba nung osang tejangja agitsü atema SDG social media handles @sdgccnagland nung tongteprateptsü akok, ta kasa sangdong nung shia lir.

2buba All Nagaland Dr. Imkongliba Ao Memorial Open Volleyball Trophy tenzükogo



Dimapur, Luchii/December 13, 2021: DDSC Stadium nung 2buba All Nagaland Dr. Imkongliba Ao Memorial Open Volleyball Trophy tenzükoga MH-10 Kohima aser Changtongya Volleyball Association na tsüngda asayaba noksa nung angur.

**Dimapur, Luchii/December 13, 2021 (TYO):** Japukong Youth Organization (JYO) ajanga ayongba 2nd All Nagaland Dr. Imkongliba Ao Memorial Open Volleyball Trophy ya Hombarnü DDSC Stadium nung tenzükogo, ta sangdong ajanga metetdaksü. Iba asayamung lapokba sentong nung, Deputy Commissioner, Dimapur Rajesh Soundararajan-i, asayar tajung ka akümtsü asoshi nisung ka dang ajemaluba shisatsü alitsüla aser junga asayatsü asoshi pei dak tamang yur nükjiding tulu ayutsüla, ta ashi.

Asayartemi machi-ma jem tsü / temese pba chiyongsü nungi pilar alitsüla/mekongshitsüla, ta Rajesh-i asayatem ayongzük; kechiyong item chiyongsü achi-ajemba ajanga asayar tajung aika taküm raksaogo, ta pai metetdaksü. Asayartem sempet jangjatetsü asoshi sabang ka agütsüba atema DC-i iba asayamung tayonger dang pelaba metetdaksü. Iba asayamung nung takok angur team nem senpet 1,25,000; Runner up nem senpet 75,000 aser semi-

finalist team ana nem senpet 25,000 (25,000 each) agütsütsü. Iba den külemi best spiker, best setter aser player of the tournament atema individual prizes senpet 10,000 agütsütsü renema lir. 2buba All Nagaland Dr. Imkongliba Ao Memorial Open Volleyball Trophy nung team 9 agi shilem agidar. Item team ji MH-10 Kohima, Changtongya Volleyball Association, JYO, Trinity Club Kiruphema, Elite Spikers, Ball Blasters, Peak Young Spikers, Team Vikuho aser Pugu Volleyball Club asütsü, ta kasa sangdong nung shia lir.

Emma Raducanu dak Covid-19 putet



**Luchii/December 13, 2021 (Agencies):** US Open champion Emma Raducanu dak COVID-19 putet aser tan hopta Abu Dhabi nung asayatsü aliba Mubadala World Tennis Championship exhibition asayamung nung la masayatsü. Hombarnü, arishi küm 19 tain Raducanu-i la dak Covid-

19 positive putetba osang metetdakja liasü. Raducanu, shibai September ita Flushing Meadows nung takok anguba mapang major asayamung ka takok angur rongnung mezüing qualifier aküm, December 16 nungi 18, 2021 tashi asayatsü aliba Mubadala asayamung nung lai Olympics singles gold medal angur Belinda Bencic den asayatsü renema liasü. "Abu Dhabi nung fans matsüing dang asayatsü asoshi kanga yongya liasü, saka tia makai kü dak COVID-19 putetba sülen, taruba asayamung atema maongka tajung mangu tashi asayatem thitsütsüsa akümtsü," ta Raducanu-i ashi. "Ozüing agi melaba ama ni quarantine südar aser iba tashidak nungi yakta taneptsü

ngur tanaben tennis asayatsü imlar," ta lai shisem. Mubadala World Tennis Championship tayongertemi ashiba agi, iba asayamung nung Raducanu melena asayadaksütsü asoshi temaba jenjang nung alir asayar tetemjen ka bushidar. Men's world mo.6 Rafa Nadal aser taoba küm US Open takok angur Dominic Thiem nati Abu Dhabi asayamung nung shilem agitsü terenemba lir. Sangküm 2022 season Australia nung metenzükdang, Britain nung Andy Murray, Russia nung Andrey Rublev, Norway nung Casper Ruud aser Canada nung Denis Shapovalov nungeri iba asayamung nung shilem agiba angutsü.

Martinez nem 'WTA Coach of the Year' naroküm agütsü

**Luchii/December 13, 2021 (Agencies):** Taküm Spain tsür Garbine Muguruza-i title asem tashi takok angutsü nungita yariba atema, lar coach Conchita Martinez nem 'WTA Coach of the Year' naroküm agütsü, ta sangdong ka ajanga tetsür tennis indang tentet WTA-i metetdaksü. Guadalajara, Mexico nung anaben Grand Slam takok angur, Muguruza-i season tatembuba WTA Finals title



makokdang, Dubai aser Chicago nung lai title ana ngua lir. Taoba küm Iga Swiatek indang coach, Piotr Sierzputowski-i 'WTA Coach of the Year' takok ngua liasü. Martinez-i iba award mangudang, World No.1 Ash Barty-i küm tanabuba atema 'WTA Player of the Year' aser U.S. Open champion Emma Raducanu-i 'Newcomer of the Year' title' angu.

Mahela Jayawardene-i consultant coach inyaksü

**New Delhi, Luchii/December 13, 2021 (Agencies):** Sangküm January 2022 nungi tenzükoga küm ka atema "consultant coach" ama inyaksü asoshi, Hombarnü, Sri Lanka Cricket-i taoba mapang captain aser batter takotet Mahela Jayawardene shimba sangdongogo. Taküm küm tetenzüklen UAE nung T20 World Cup asayamung nung Sri Lanka indang Round 1 asaya mapang senior national team indang consultant ka ama Jayawardene-i inyakogo. Mumbai Indians den asayar sülen, Mahela Jayawardene ya T20 nung tasa tajung amshia asayar rongnung tajungtiba ka ama züngshir. 2016 küm Ricky

Ponting melen Jayawardene-i Mumbai Indians indang head coach mapa agizük aser pa aküm nung team-i 2017, 2019 aser 2020 küm IPL title asemben tashi koka lir. Senior team nung Consultant coach dak alia, Jayawardene-isa U-19 Sri Lanka team atema mentor aser consultant ama maneni inyaksü. Taküm küm tetenzüklen, U-19 team atema Jayawardene ya consultant ama shima liasü. "2022 küm Sri Lanka team international asayamung aika nung asayatsü renema aliba mapang ka nung, National Team nung Mahela adenba osang angashia pelar," ta Sri Lanka Cricket, CEO Ashley De Silva i ashi.

Commonwealth Weightlifting Championships: Ajay Singh-i gold medal angu



**Tashkent, Luchii/December 13, 2021 (Agencies):** Tang asaya aliba Commonwealth Weightlifting Championships nung, Deobarnü tebur 81kg category tetoktepba nung India nung weightlifter Ajay Singh-i gold medal angu. Arishi küm 24 tain Ajay-i gold medal anguba yong, Birmingham nung sangküm 2022 Commonwealth Games atema pai indang indanga qualification nguogo.

Championships 2021 nung #IND-i ano medal 2 nguogo, kong Men's 81kg nung #AjaySingh-i 322kg (147kg+175kg) ajungketa GOLD medal angu. Ano, Women's 59kg nung #PopyHazarika-i 189kg (84kg+105kg) ajungketa SILVER medal angu," ta Twitter nung SAI-i lemsatep. Honibarnü, Tetsür 59kg category tetoktepba nung, India-i tsür Hazarika Popy-i 84kg snatch aser 105kg clean & jerk densema lai 189kg ajungketba sülen, lai tanabuba jenjang ajangzükset.

Commonwealth Games atema qualify asütsü mechi, tebur 81kg category tetoktepba nung Ajay-i seret ajak sentepa 322 (147kg aser 175kg) ajungketa liasü. Iba den külemi, 147kg snatch ajungketa mapang, Ajay-i national record yangluogo.

Jeremy Lalrinnunga aser Achinta Sheuli sülen, 2022 Commonwealth Games atema qualify asür India nung weightlifter rongnung Ajay Singh tasembuba asütsü. "Senior Commonwealth

India ya Commonwealth linük ka asünung, India tenung nungi weightlifter temi championship anaprongla nung shilem agidar.

**BILEM DANGANG**  
"Meyipa angutsü meimlai teyari agüjang."